

১লা বছর ॥ ১লা সংখ্যা ॥ আগষ্ট '৯২ ইং

প্রথম  
কাঁপি,

চিন্তা  
করে।

চিন্তা





## সূচীপত্র

সমীপেষু  
কবিতা

○ ছনাগিরক বিঃ বিঃ—

ধনঞ্জয় রাজকুমার

১

○ সমাজ দরদী—

নীতি সিংহ

৩

এসাদে এসাদেতে

○ বেলী বা-রো বৌ—

গোলাপ বাবু সিংহ

৪

গল্প

○ দশমিক ভগ্নাংশ—

স্মৃতি কুমার সিংহ

৬

আর আর সাহিত্য

○ চিঙখুশি—

প্রেমচাঁদ ( হিন্দি )

অনুবাদ—শান্তি সিংহ

১৪

প্রবন্ধ

○ অগ্নি মন্ত্রত দীক্ষা দেই—

ইন্দ্রকুমার সিংহ

২৬

শিল্প সংস্কৃতি

○ ভূয়ালকা পুরস্কার

২৯

সমালোচনা ○

বিজ্ঞান ○

৩১

পৌ ○

৩২

৩৩



মন্নিয় এতা জীবশ্রেষ্ঠ অ পারেছিতা যে বৈশিষ্টহানলো, উহান অইলতাই—চিন্তা। বস্তু জগতর হাবি বস্তু যেসাদে ইলেক্রন, কোরাক ইত্যাদি মৌলিক কণালো হওছে, উসাদে বর্তমান জ্ঞান, বিজ্ঞান, শিল্প, কলা, সাহিত্য আদির মৌলিক কণা—চিন্তা। মৌলিক চিন্তাই সমাজ আহানর মূলধন, উন্নতির কেইরাক। এ মূলধন নেয়ইলে লেইরা, থাইলে বরা। এ মূলধন আহরণ করতে সমাজ আহানরতা যুগ যুগান্তর লাগের। অথচ দুশ্চিন্তা চক্রবৃদ্ধি হারে বাড়ের। চেইতে চেইতে ভাইরাসর সাদানে সমাজ আহানর প্রেরণার আকাশ হাপদের। যুবশক্তিরে পঙ্ক করেদের, অন্ধ করেদের। এবাকা আমার বিক্ষুপ্রিয়া মণিপুরী সমাজ দুশ্চিন্তার স্রমুদ্রত। মেইতেই ভাষা অষ্টম তপশিলভুক্ত অইলে আমার ভাষা স্বীকৃতি আর অইতইতা? গাওঘরে অধঃগতি শিক্ষার মান উর্ধগতি অইতইতা? চাকুরি নেই, শিক্ষা নেই, কাম করানির ইচ্ছা নেই আমার শৌ কিসাদে জিংতা অইতাইতা? আমার সাহিত্য জিংতা অইতইতা? সাহিত্য নেয়ইলে জাতর পরিচয় থাইতইতা? অপসংস্কৃতির পাঞ্জাহানাঙ নিজর সংস্কৃতি কিসাদে জিংতা করানি! রাজ্য নেই এ জাত এহান ভারতবর্ষত কিসাদে নিংশা করানি! এতা হাবি দুশ্চিন্তাত আমি অন্ধ অ'যিয়ারগা। অথচ দুশ্চিন্তা এহানও চিন্তারই আরাক'রূপ আহান, অধার বারাহান। দ্রুত প্রজননশীল এ দুশ্চিন্তারে ভাল সূচিন্তাত রূপান্তর করে পারলেই বাজীমাত। দুশ্চিন্তার স্রমুদ্রতই ডুবুরির সাদানে বিছারেয়া নিকালানি লাগতই সূচিন্তার মুকুতা। সমাজে দক্ষ ডুবুরি বিছারেয়া নাপেয়া, হবে হাতুর হিকতারা শৌ কতগই আর আরতার সাদানে ডুবুরির ফিজেত পিদিয়া মুকুতা বিছারানির যারি—এ তিন-মাহিয়া 'চিন্তা', গিরিগিথানীর আতে।



আমার চিন্তা পত্রিকাত প্রকাশিত লেখনি উত্তার গজে কোন  
মতামত বা সমালোচনা থাইলে চিঠিপত্ৰল ইকরিয়া জানেইতে  
দ্বিধা না করবাং ।

সম্পাদিকা

যোগাযোগর ঠিকনা :—

NISHI SINHA

C/O.—Dist. Ele. Edn. Office.

P. O.—Silchar-3, Cachar.



ছনাগিরক বি. বি.

১

মি বেরতোলাং ব্রেস্ট আহেছুতা কালা জঙ্গলেত নিকুলিয়া  
আনেছে ইমাই মোরে শহর এগং  
মি তেইর গারিগং আছিলু উবাকা। বনর ইংহান  
থাইতই জনম এহান। নামরেছু পেয়া।

২

হবা অয়া আছু পিচ দেছি শহর এগং। আগেংতো  
মরণের মন্ত্রহানে গারিগ সেঙছে মোর :  
খবর কাগজ। যাক তাম্রকুট। বার মদ।  
সন্দেহ প্রবণ। আটেলপা। অয়াও বার অসন্তুষ্ট নাগই।

৩

মানুরাং হবাগ মি। তানুর সাদানে মিয়ো  
টুপি যুরে দেছু। মাতুরি মি এতা আকেইগিতে  
নিয়াম থিয়য়া গং আহের জন্তুগি। মাতৌরি মি :  
উতাউ কিতাতে আছে, মি স্বয়ং উসাদেগ।

৪

বিয়ানেদে শূন্য মোর আরাম চেয়ারে আকেইদিন  
জেলেই কতগ বহাতুরি  
মোর আহিছগি থার উতারাং। মনোযোগ নেয়া। মাতুরি তানুরে—  
মি এগর গজে তুমি বিশ্বাস করানি থকনেই।

৫

সেন্দার পরেদে মিতে পুলকরুরি মানুষুলি  
আমারে আমিতে ডাহিয়ার জেটলমান। টেবিলে তুলিয়া জাঙ  
মাংতারাতা—হবা দিন আগেদে আহের।  
নাউ আঙ করুরি : কুমবাকা।

১



ডালফু ডালফু বিয়ান পরেদে পাইনর গাছ লহিকরতার।  
 উতার উছনি পাহিয়াই রহানি অকরতার।  
 উবাকা মি লয়নির মদসিটা পিয়োরি শহর এগৎ।  
 সিগারেট টুমাহান উরাদিয়া শান্তিহীন গুমে পকুরিগা।

আমি বুঝ নাপড়েছি মানুষ এতা খায়ার উজাত গরে  
 যেতার নেয়ছে খংস বলেছিল।  
 ম্যানহাটানর হাবি উচ গর এসাদেহে হংকরেছি আমি  
 স্মৃষ্ণ এরিয়েল যেতা হারউ করের আটলান্টিক।

শহর এগৎ থাইতাই উতাহে শিচ্চিল  
 যেতা শহরর হাদিয়েদে গেছেগা লালয়া - বউ।  
 এরে গর এতা পেট ডাউররে নুঙেই করের, অরতা উদালা  
 আমি জানি—আমি এতা অমর নাগই  
 আমার পিছেদে য়ারি দিলতা নেয়ইতই আর।

ভূমিকম্প যেহান অইতই উহানাং তিতা অয়া  
 মোর এরে সিগার এগরে নিবানি নাদতো।  
 মি বেরটোলট ব্রেস্ট, কালাজঙ্গলেং, কইদিন অইলতা  
 মালফর পেটে থাইতে তালকরেছি পিচর শহরে।

অনুবাদ : খনজয় রাজকুমার



## সমাজ দরদী

হাগহানাত বরণজুরি আহান খাঙ্চে আটেরা  
সমাজ সেবাত লামলা

বরণর ফুটাগিরি কাম বাটেদেছে  
অদৃশ্য সংকেত আহানে

আকতাই সেউকরাত গই অছি  
দলানর উছ ছাদ

কতগই রেললাইন পথঘাটর আনিকা  
বারো কতগই দনাত গই অছি  
টেঙারার ধুলিরা পাতা

কতগ খেলাত মত্ত অছি  
টবে রুৱাছি ফুলর লগে

কতগই মেইকুথু অছি  
ইহুম দুৱা লপুক আগত

এতাহাবি কাম আকসাটে করিয়া  
ঙাহাক আহান জিরাছি  
সড়কর কাদার  
নেম একচালি ঘরে ॥

নীতি সিংহ

—ঃ—

চিত্তা



## বেলী বা-রো বো

এসাদে এসাদেতে বেলী বা-রো বো দ্বিয়গিয়ে আকদিন কৌলি লাগলা। বেলী এ মাতল, “হে বোহান, যেতাও মাত, মি তোরাং ত বলী।”

বো এ মাতল, “কোনদিন ও নাগই। মি-এ জিঙে বলী।” বেলী এ মাতের “মি জিঙে”, বো এ ও মাতের, “মি জিঙে।” হানুতে কিসাদেতে এহানর মীমাংসা অইতয়? লয়ইতেগা বোহান এ মাতল, “অউতাইলেতে পরীক্ষা অক্।” বেলীহানেও য়াকরল, “হায় পরীক্ষা অক্।”

ঠিক অউ সময়ত মানু আগ পুথগ ইলয়া আটিয়া য়ারগা অউহান দ্বিয়গিয়ে দেখলা। মানু অউগর গারিগত মকার আচালা আহান আছেহান দেহিয়া; বোহানে মাতল, মানু এগর গারিগত আচালা এহান যেগই সেচা পারতই অউগ নিয়াম বলী বুলিয়া প্রমাণ অইতই।

“নিয়াম হবাছে মোরতা আপত্তি নেই।” বেলীহানে মাতল। “কুঙগই তে অকরতই?”

“তি অকর,” বেলী এ মাতল।

বেলীর য়াথাং পেয়া, বো এহান খাংচেং আটাবেলেয়া পাঙ্কাল আছে মাহেই ফু-ফু ফুদিয়া বোহান এরেদিল। ছ-ছ করে বোহান চলেয়া গাছ-বিরুখ হাবি উণ্টেয়া পান্টয়ো বেলাত লাগিল। এবেদে বারো বোহান জবর অ'য়ারগা মাহেই মানু অউগয় চেংকরে আচালাহান গারিগর লগে আটেয়া দ্বিয় আতল ধরিয়া থইল। বোহানে লেম্পাল ঠেলেয়া লাগিয়া ও তার গারিগত আচালাহান সেচা নুয়ারল—তা ঠু-অয়া বহিল।



অউতার পিছে বেলীহানৰ পালা আহিল। তা মুক্ছি দিয়া হাতে  
হাতে তার মেইচাকহান কাকৰাত লাগিল। মানুগৰতা পিরিক  
পিরিক ঘাম ছৌরনি অকরল। রইদহান নিয়াম সারইল অউবাকা  
গাছ আকজারির তলে ছেয়াগত বহিল—বা-রো গারিগর আচালা-  
হান খুলিয়া—বৌদানিত লাগিল। মুরগ খাজুৰা খাজুৰা বৌহানে  
মাত্ৰ, “মি হারলু, হারপেইলু, তি মোরাংত বলী।”

গোলাপবাবু সিংহ

### পত্ৰিকার নিয়ম কানন :

১। প্ৰতিকাতে ইকরা দেনা মনেইলে তলে ইকরা ঠিকানাত দিয়া  
পেঠা দিবাং।

Shanti Sinha

C/o. Aswini Sinha

VILL—Bhatirgram

P. O.—Bekirpar

D st.—Cachar, (Assam)

২। কবিতা, অনুবাদ কবিতা, প্ৰবন্ধ, ছোট গল্প, অনুবাদ ছোট  
গল্প ইকরিয়া দিয়াপেঠা দিবাং। কোন ইকরা আলথক  
দেনাৰ ব্যবস্থা নেই।

৩। আমাৰ পত্ৰিকাত প্ৰকাশিত, উতাৰগজে সমালোচনা  
ইকরিয়া দিয়াপেঠা দিবাং।

৪। দাম :—(১) সংখ্যালৈহে ৰূপা ১০ মাত্ৰ।

(২) বছৰকী ৪০ মাত্ৰ।

:—:

[আমাৰ ভাষাৰ লেইরিক বা পত্ৰ পত্ৰিকা লইতে বা পাকৰতে  
আটেলপানি থক নেই। এবাকা আমাৰ মুণ্ডে এহানাই হাবি  
ডাঙৰ দায়িত্বহান।]

চিত্তা



বিয়ান পরহান। খুরাহান সেচেয়া নদীয়ার মাংকলে তেরচা অয়া পড়েছে রইদহানাত কুলুঠক কুলুঠক কাহে কাহে কল্ঠাগ অয়া বছে নদীয়ার আশি বছরর বাপক তমাল সিঙ। কাহানিহানে ডিল-ডিল। আহিথম বুদ্ধকো নিকুলেছে। বাউ মাছর সাদানে নিংশাহান। কুমলেইনা কাছরা এহানে নংশাঙ অইল তারে চানাপ্লা ফামে বেলাছে। আটাফিরাতে নেইতার নেই ঠিকদিয়া মেত্তমকা বনার মুকছরও নেই। রইদহান পড়লে জিপুত, নাতিনাতলে ধানপেলীর সাদানে ধরিয়া ছরাত নিকাল দিতারা, বেলী হমানির পরে বারো ঘরে ভিতরে বরেইতারা। বুকগ বুজে জলা, যন্ত্রণা, যারো; মুরগ বুজে অউলি জউলি চিন্তা।

হোগদে বুলতে পরাণ মাষ্টারর মাংকলে বেলীহানাদে পিঠিবুলন দিয়া অংকলো মেইখা অছি পাঠশালার শো কতগ। পরাণ তমালর খুলা পুতক। পুতক অইলেতে কিতা অইব, বুড়া অনির পিছে তা পুতকরে ডরপার। না ডরেয়াতে। ফিবামহানে, খন্তাহানে— মাষ্টারগ নায়া মঠর হিন্চাপাগ বুললেহে চুনা অইব। কানাহার আড়গিয়ে ডাঙরতাই হদাই দাত কামারেয়া থার পারা। জেঠা পুতক নদীয়াতে বৈষ্টবগ। লেইরাহানে খম খেঙইলেও জীবন ফুর্তি জনগ। আলেত আইতেও অটগিত মনসিকা, মেইখঙে মুকসিহান নাপয়া থার। জিপুত বুলতে এ ছুগুলি। পানথে খানি নোঁরাক অনাই থাংনা থাংনি এ দ্বিয়ো বেইবুনিরে ডাঙর করতে মালকতে মালক, বাপক তমালরতাও গারিগ খুতপ কতোহান পড়িলগ। কনাকে চান্না অছিলাতাতে উপায় নেই। এবাকাতে তঙাল তঙাল জিনা। নদীয়া ঘরগ খুলা বেয়করাং এরদিয়া উঠানর আগাত টেপশো আহানাত মোঁরেই জিপুতরেলো অঙইল। বি মিরাস খেইপক খেইপক। বাপক জেঠাগর বাটে, মালক খুলা উগর।



“আঠারোরে তিনলো ভাগ কর।”

দ্বিতীয় শ্রেণীর শৌগিরে অংকহান দিয়া, নাকর ছিদ্ৰগিদে পিরকাই থো আছুলিয়া, খইতঙগত ফুটি আহান তাকুরে তাকুরে পুরাণ মাষ্টরে কাদাত ধারাপাতহান সালকরিয়া এলোচুরারিয়া বছে জিলক শৌগর বেদে চেইল। বাপকর মিলেঙহান পড়ানির লগে লগে নারগ আরাক থাক আহান কাকরিয়া তালে তালে, লরে লরে পাকরানি অকরল, “...তিনদশ দুই বত্রিশ, তিনদশ তিন তেত্রিশ, তিনদশ চাইর চৌত্রিশ....” মালকে বেরাগাঠি দিয়া উরাদেছে আচালাহান হচরত অয়া লরগহান লেহে গারগত্ত সেচের খাঙও আচালার ভিতরেত্ত আত নিকালানি নেই। মুরগলো হচরত গাঠিগ লেপ্পালহানাত জাতেয়া কোশালি করাত লাগেছে। মনহান পুল্লাপে আচালাহানাত থাইলেও বাপকর ডরে ছাং অভাসমত আঁরাহান একেবারে শুদ্ধ অয়া নিকুলতে আছে। বাকী শৌতা সিলেটহানিত উবুরি অছি। পরাণে তার উদালা পিঠিহানাত থোরে চেপচেপা আতর তারাহানলো ‘চের্‌কো’ থাপন দিল। শৌগি কার ভাগ্যত পড়িলতা বুলিয়া ডরা ডরা বেঙকো আগরে আগই চেইলা। তার জিলকশৌগ উঙখাত অয়া ‘তিনদশ নয় উনত্রিশ’ বুলিয়াও জুহান কেট্‌কো কামারেয়া মুর নঙেয়া বাছেয়া থাইলী।

তমাল সিঙও উঙখাত অয়া মুঙর ঘরর মাংকলেত্ত নাতিনকরে ডরা ডরা চেইল। পরাণ অজারেও আকফির। নিকু মাংকলে বয়া শৌতার লেরিক তামকরানি হনতে হনতে নিঃসঙ্গ তমালর মন-হানও শৌতার তুলো মান্না অ পরেছেগা। তাও অংকলো মেইথু অর। পরাণ তারতাও অজাগ অ পডেরগা। পরাণে তাপ্প জিলকর গারগত্ত আচালার গাঠিগ ফুকেয়া বারো জুংকরে বাধে দিল। তমালও নিংশাহান বেলল। পরাণে শৌতারে আংকল, ‘ভাগফল কতি?’

‘ছয়।’ শৌতাই চিকারি দিলা। তমালে এ মাংকলেত্ত নির্ভয়ে মনে মনে লোঁদিল, ‘শূণ্য।’



‘ছয়। বেশ।’ পরাণে উরতগ খোলো খাপন দিল।

তমাল বিল বিল করে পরাণের চেয়া বাছেয়া থাইল। তার পিঠিহান আঙ্গানে হিরহিরেইল। তারতা যে ভাগহানরতাও ভাগ-ফল শূণ্য অরতা কিয়াখাও? খালকরাত লাগিল। মাতাঘালা মিকূপ ঔহানাত পানথে পরাণর ঘরেত্ত নিকুললী। তেইর কাপক পারা চুল সেটুকাপা, কানহানাত থলা তেরা ফুলগি য়ালছে। তমালর ভাবনার নানগাছ ছিড়িল। শৌর হাদিত্ত আকফালে ফামে আহিল। মুরগ ঝাকারেয়া কোলিরকা হিঙ ধারেয়া থাইল। পানথে হৈ হৈ করে হেক তার মুঙহান পানা ফাংনেই তমালাে ঠিচালাই অকরল, —‘উম্, কামিলীগ মালয়া ডেপ ডেপ করিয়া আটরী।’

—‘নায়াতে’ তোর ভেকি বিরণর কাপক ফেট্টে গুজা অয়া থাইতু।’

—‘হেই, হেই, থতাহান সামালেইছ। নাইল—কুলঠুক—কুলঠুক—’

—‘লৌদে, লৌদে। কাছরাহানলো বিয়ানকার পাথাপহান অকর।’

—‘আঃ, লাকচা এহানতে। দেখতে—কুলঠুক—আকবারিত—’

—‘দিতইহে পাউরি। বাই ছনরগতে, আংকুরি কারের ঔগই।’

‘আইস, মি থায়া কিতা করতু - ?’

‘কিতাতে করতে। দ, তালমিছিরি চুরা। তোর পুতকে আনেদেছেতা।’

মাংকলে লেরিক চেইতারা শৌতা হাবিতা পাছরিয়া চিয়া করে আহিলা। নাউ গনিয়া তাল মিছিরির মচা উহান তমালর কাদাত থ দিয়া, মুকসিহানলো পানথে পহরীগদে গেলীগা। দ্বিকুড়ি দশ বছর হেইমাক অয়া পালয়া তেই হারপাছে—ইমে হুংকারগনা।

তেইর গারিগত কুনোদিন খেড়গাছলও সকনি নেই। হাবিও হার-পাছি, এতা এ হেইমাকর মারাক নেই কোলি। লৌদালৌদি ছনিয়া আহিতারা শৌতারে পরাণে হুংকার আগ দিল। ঔতারে ছুটি দিয়া বাপকরে দিশা করিয়া কাকেই কারল পরাণ। ভাগ অংকর বাঘগর ছেয়াগ পড়ানিয়ে তমাল হামুকগর সাদানে চানাপ্লা মেইমুত অইল।



তারে বিল বিল চেইল। পরাণে শৌগর সাদানে বাপকরে ফেউকরে  
 উরে লয়া উঠানে লামিল। উহান দেখিয়া পানথে পহরীপারেত্ত  
 আলথক আয়া মাংকলেত্ত তমালর ফামহান তুলিয়া উঠানে হাবিত্ত  
 রইদ পড়েছে কোণে পারে দিল। তমাল পুতকর উরহানাত থায়া  
 তার মেইথঙহানাদে চেয়া হপারা থতাহান আংকরিয়া কানহান  
 য়োকরে আহানি আহান দিল। পরাণে বাপকরে ফামহানাত বহা  
 দিয়া হিনাত গেলগা। পানথেয়ে রূপো কবিরাজে ছাগির ঘি বারো  
 বছর মারায় তিলকরিয়া দেছে মালিশ অউতা তমালর পিঠির  
 গুজগত তাকুরে তাকুরে মালিশ করে দেনা অকরল। মিকূপ  
 আহান আগেকার গড়েইপা কোলির চিনত এ বুড়াবুড়ীর মেইথঙে  
 মিঙটা আহানও নেই। এঁজাত কোলিই তান্নর অদ্ভুত প্রেম। লেউউর  
 তলে ফল্গু। আগই আগর লগে মিলনর হেইচা লাংকরানির  
 বিশেষ রূপ আহান। মিরাসমাটি, কলথেরির লগে ভাগবাটুরা অছি  
 এ ইমাবাবা, জিপুতর খেই খেই জিনার চেইখালগ লালয়া তিলনির  
 নিয়াম চিলপেইতার। কিয়া বুন্নে, লৌকিক লাজ, লেইরা বরার  
 ফারাক, বৌরের সনৈদ, অশান্তি হাবিয়ে তিলয়া চেইখালগর পাখা-  
 রিহান নিয়াম। বিয়ানে মাদানে তমালর হজক যুগত করে দিতে,  
 মালিশ করে দিতে মেত্তমকা কাদাকাদি অইতার। উপেইত হিন দুখ  
 হাবি ককর। এ মিকূপ এহানির সালেদে নিঃসঙ্গ তমাল আ করে  
 বাছেয়া থার। বাছেয়া থার তেইর বানালো যমকরা খুত্তল, আতর  
 মাঠিয়া পানার খোঁরাঙলো। তেই কাদাত বয়া মঠিয়া দিলে তার  
 কাহরাহানও থিতর পারা। যারি দিল মানু আগও কাদাত পার।  
 তালমিছরির টুমাহান গালগদে ঠেলা দিয়া তমালে গজেদে মেইথঙ  
 তুলিয়া মাতানি অকরল, 'হারপেইলু, জীবন এহান অংকহান এনা।  
 যোগ মানে জরম' বিয়োগ মানে মনণ।' মালিশর গতহান পাহরিয়া  
 তার পিঠিহান আদে আদে একীন অয়া হনিরী পানথে। আহিথমে  
 মেত্তমকারকা বাহিল কার্তিকর পালিত লেউফুলর ফিতূপ আহান



গারগত বেলেয়া অর্থ দিল তমালর মূর্তী ঔগ। তমালে যারি দেনা না জিরার। ইছমতুরা মালঠেপ মেইয়েলর দ্বিয়োকালুর হাদিত, গিল্লা-হানর সাদানে তালমিছরির টুমাহান তমালর এ গালেত্ত হোঁগালে নিশ্চিন্তে পাওচেল গাদানি অকরল।

বেলীটিকে নদীয়া গাটর পারর মিয়ার ক্ষেতির বারিহানাত আলথক অয়া আয়া বাপকরে হিনা দিয়া আকসাটে ভাতপানি খেয়া জিরেইলা। তমাল ঘরর এ বাজুত, সন্দুকগর গজে বজ্রাসনে আতহানিলো মুঙে ঠিকাদিয়া বনার হুন্না করের। নদীয়া হোঁবাজুত তার কামহানাত বয়া হ'জকারি আশুলে আশুলে জিরাছে। মন-শিকার খল্লিক আগ গুণগুণার। কদাল মারতে মারতে তার আতর সিংলেই টিঙ টিঙ করে নিকুলেছে। কাঞ্চনপুরী নারিকেলর আরিগ মাঠিয়া মাঠিয়া তা কুড়ুক কুড়ুক করে আশুলের ঔহান তেরাদে চেইতে চেইতে আর জারে হুরারিয়া তমাল সিঙে পুতকরে ডাকল, 'নদীয়া, বাবা হিনপেইলেও পিঠি এহান ঝানি ধরে দিয়াতা। আজিতে খানি ইহো আগ অকরেছেতা।' নদীয়া এলাহান খামকরিয়া বাপকরে চেয়া মুকসি দিল। তা আরিগলো বাপকর সন্দুকগর গজে বহিলগা। বাপকর পিঠিহানাত আত আহানলো ধরিয়া আরাক আকআতে হ'জকারি আছুলে আছুলে ধূমা এরে দেনা অকরল। হ'জকর ধূমা নাকগত লাগানিয়ে তমাল ডিগল করে নিংশা কারানি অকরল। তা হ'জকারি ছাড়া চলে হুরারলগ। এবাকাতে কাছরাহানর সালে সুপ সকনি নাদতারা। গতহান পেইলেও মন এহান চামর পারা। নদীয়াই বাপকর মনহান বপিয়া তাপ্ন মাতল, 'বাবা, আকচুম দিতে?' 'হে—' পিঠিবুলন দিয়া তমাল সিঙে থতাহান হাবি এরেদিয়া গলিয়া আহানি আহান দিল।

‘কিত্তাও নেই, আকচুমেতে কিতা অইতইথাও।’

‘দিতু?’



নদীয়াই কিতাও নামাতিয়া বাপকরাং হ'জকারি সিলকরল । তমালে আরিগ আতর তারাহানলো পুছিয়া হেক য়োকরে আকচুম দিঙ বুলিয়া থতাহানাত লাগেইতেই ছরারহানাত পানথৈরে দেহিয়া খামইল, 'অহ্, ফৌঅইলীহা ।'

'পি, পি, কিয়া খামইলেতা । ধানর কলহান অকরবেতা, পি ।'

তেইর আতহানাত গাছ গাছরার পাতা, তমালর হজকর অনুপান ।

'হেরা, ধূমা নিকালাদিঙ বুলিয়া—'

'ধূমাতে কিয়া, মোরে নিকালা দিয়া বাপক পুতক রাইশাঙয়া পিয়োনে ।' জেঠি বহক ঔগই চাকামর কুঠাগত গাহালি শৌ আগত পাতা উতা ছহিয়া খেরি আগত রস নিকালেয়া দিল । পানথৈ নৌরাগত হজক অনুপানলো তাকরে তাকরে বক বক করানি অকরল, 'রকত বড়িয়া খাঙকরতেও হজকারির লোভ এহান বেলা ছুরারলে । হাবিতা বেলা, কৃষ্ণথয়া নিংকর ।'

'অইলগা এর্, গিধানক ।' আর কথা না বাড়েয়া তমালে ভাপ্ত পুতকরাং হ'জকারী সিলকরল । নদীয়াও লাজপেয়া তার ফামে গেলগা । তমাল হজক ঠাকহান খেয়া সুপ না টটরেয়া ঘুম আহান ঠৈমকরল ।

সেক্কার পরে তমালর কাছরাহান ইহৌ ইহৌ করে জ্বর অনা অকরল । হাদি এহান নিক্কা বেলী হমানির পিছে বারিদেৱতা কিয়া-খাঙ বুলিয়া খালকরে খালকরে নদীয়া মালকরে ডাহিয়া বাপকর কাদাত বহুরেয়া রূপো কবিরাজরে ভাহাত গেলগা । পানথৈ ছনানির লগে লগে আইলী । জেঠি বহক ঔগই কিতাই পিঠিহানাত মালিশ করে করে ছুরারাগর সেবা করানি অকরলা । পরাণ মাষ্টারর ঘরে ভিতরে শৌতা থঙমেইহান বেরি দিয়া বারো অংকলো মেইথু অছি । জিলকশৌগর নারগ বাহিয়া আহিল, 'আটদশ এক একাশি, আটদশ ছুই বিরশি.... ।'

পরানে শৌতারে পড়া দিয়া হাদি হাদিত বাপকরে তালাবি আহান



করিয়া যারগা । শৌতার পরীক্ষাই বিভা অইলতাই বাপকর নাতা  
এহানে তার মনহানও কালিরা আছে । কাহানির চুটে তমাল ঠুঁঅছে  
কুকুরগর সাদানে ফ ফ করের । আহিথম মানা রকত । শৌতার লেরিক  
পাকরানির নার তার কানহানাতও ফৌঅরগা । মেত্তমকা ঔ চিন্তাত  
বিভোর অর বারো হিনহানে কেকার । হাদি হাদিত মারাম অর  
ঔপেইত দ্বিআকচুটি আবিজাবি কথা পানথৈরে মাতের, বিবিয়ানি-  
হান পারা করে—

‘পুরণ এহান আশা, লোভ, হারো । ভাগ এহান দুঃখ, আলা, হিন ।  
দাদার জিখুত ঔতা আগ নাইল । পৌ নাপাছিতা ? জাঙাক  
ঔগও —

‘অইলগা নিয়াম না টটরেই ।’

‘তালমিছরি ঔতা আছেতা ? না, অবশিষ্ট শূণ্য ।’

‘একরে দুইলো ভাগ কর ।’ পুরাণর নারগ । তমাল বিভুলা অইল ।

‘ভাগফল কতি ?’ শৌতাই লোদিল ‘শূণ্য’ । তমালর ডিলডিল আছে  
আহিগি চিকচিক করল । তা হারো অয়া পানথৈরে মাতল, ‘দেখলে ?’

‘অবশিষ্টে ?’

‘এক ।’

‘চুমইল ।’ তমাল নিংশাহান বেলল । ‘তালমিছরি কইতে ?’

‘অর্থাৎ, একরে দুইলো ভাগ করানি নাকরের ।

‘নাকরের, নাকরের । কোনদিনও নাকরের ।’ তমাল হারো অয়া  
মাতল, ‘হনলাইতা, নাকরের । নিয়মে নেই । তেশ্—’

‘কিয়া বুন্নে, দুই এগ একেত্ত ডাঙর সংখ্যাগ আরো, ‘নাগইতা ?’  
পুরাণর নারগ ।

না, নাইল । কতি হারপাছেতা । একেত্ত ডাঙর সংখ্যা আর  
আছেতা ?

ইশ্বর এক, আত্মা এক — তমালে বিবিয়ানি অকরল—

“নৈনং ছিন্দন্তি শস্ত্রাণি, নৈনং দহতি পারকঃ ।

ন চৈনং ক্লেদয়ন্ত্যাপো, ন শোষয়তি মারুতঃ ॥



‘অইলগা এর। তুমিল অ—’ পানথৈয়ে খামকরল।

“ন জায়তে ম্রিয়তে বা কদাচিন্নায়ং ভূত্বা ভবিতা বা ন ভূয়ঃ।

অজ্ঞা নিতাঃ শাস্ততোহয়ং পুরাণো ন হন্যতে হন্যমানে শরীরে ॥”  
পরানে হৌগদে লৌদিল,

‘ছনো। এখুরুমতে নুরা অধ্যায়হান। এহানাত হিকতাঙাইতা  
আধুনিক রীতি আহান, দশমিক ভগ্নাংশ। ছনরাইতা?’

‘হায় অজ্ঞা।’

তমালও ইম্পানি অয়া কানহানি হিঙারল। পুরানর নারগ গম্ গম্  
করের, ‘এ রীতিত ছরকাং ডাঙর বৌনেই যে সংখ্যালোও আরাক  
সংখ্যা আগরে ভাগ করানি যাকরের। হারপেইলাই।

‘না—’ তমাল কাহ্নিহানে আরাকৌ ফ-ফআনি অকরল।  
কাহানিহান জবর অইল। কাহ্নিতে কাহ্নিতে কলঠাগ অইল। মুরর  
রকত হাবি আহ্নিগিত পুলইলহা।

পানথৈয়ে বহকে আকসাটে চিকারি দিলা, ‘হেই, কিতা অইলএ,  
কিতা অইল। পরাণ -

পরাণ লৌগ ছনিয়া আকফালে বাপকর কাদাত হাজির অইলহা।  
লেরিক চেইতার। শৌতাও হাব্বিতা উরা বেলেয়া এ ঘরর ছুরারহানাত  
পুলইলাহা।

স্মৃতি কুমার সিংহ

)(

নিঙলশৌগর বিয়া লেপছেতা? ফিয়ম জুং নাছেথাও? কুনো  
চিন্তা নাকরবাং। চালাক করে যোগাযোগ করিক—

**বিষ্ণুপ্রিয়া মণিপুরী হ্যাণ্ডলুম ইণ্ডাস্ট্রি**

বেকীরপার—৭৮৮১২৩, কাছাড়।

মাঠা, মাঠারকানি, কালা লেইকুম, নয়ানমুনা, মহরী, দরিয়া,  
ডিজাইন করা ফিটা যতইতি হাব্বি উপযুক্ত দামে পেইতাঙায়।



বাগারুগা দ্বি-চালি শনর ঘরশৌ আগর উঠানে নিবা জিগর কাদাত ইমে ঘটাগ অয়া বাপক পুতক বুম মারিয়া বয়া আছি। ভিতরে ডগ্ ডগ্ করিরী আকখুলী বহক বুবিয়া পেট কামাড়েয়া ধরফর করিরী। কামাডানিহানে উবা আছাড়েয়া দিরী চিকারী বাপক পুতকর বুকে সৈঁত সৈঁত লাগের। জারর পরর রাতিহান। চারিঅ বারাদে কুনো সাড়াশব্দ নেই বুম মারেছে। গাঙহান হাবি আধারে বুবিয়া আছে।

হৌরক ঘীমুয়ে পুতকরে মাতের—“জিংতা নাইতইছাং। দিন এহান দাবদা দাবদি করিয়া কাটেইলাং। যাগানে আকখুকুম করে চেয়া আইগা।”

মাধব ফিঙকো সৌ-অইল—“মরতইগতে মরে পড়লেগা রাই-সাঙইলাংনাই। চেয়াতে কিতা করতু।”

—“অমাটিক আহি রকত নেইঅ পড়লেগাতা। বছরআহান হেইমাক পালয়া হারৌ পিয়ম অয়া কাটেইলে—তেইরকা বানা মুংপি আহান তোর পেটে নেয়অইলতাকো।”

—“আতজাঙ সিকেয়া ধরফর কররী বিকার উহান মোর আহিধমলো দেহানি না মনাউরি।”

জাতে তানু চামার। গাঙর মানু তানুরে দেহে নুরারতারা। বাপকে আকদিন কামে গেলেগা তিনদিন মুছতাও দিয়া বয়া থাইতাই। পুতকর আছে খামলত উহানতে, কামে লাগেইলে আধাঘণ্টা কাম করতই ঘণ্টা আহান হজকারিল কাটেইতই। অউহানে মানুরাং কামও নাপেইতারা। চারাআহানর গজে দ্বিচারা মু-অইলেতে লমইল নায়। তানুরে লেইসি আহান থানা মুরাতও নেই। বনআগাছ এপেইত হৌপেইত তুলিয়া না সেচেইতাই। চারা উবায়া দ্বিতিনদিন পেটে নারাদবাদলেহে তানু টেঙাডাত কাইতাগা। আনতাই দারৌ অউতা



বাজারে বেছিয়া পয়সাখানি পেইলে অউহানি লয়নাছে পেয়া এগদে  
 হেগদে বাউটামি করিয়া বুলতাই। বা-রো চারা উবা অইবাতাই  
 দারো আনাত সালইতাই। এসাদে চলতারা। গাঙে কামর অভাব  
 নেই। ক্ষেতিআলাই নিয়াম। ক্ষেতির সময়ত কামিলা বিছারেয়া  
 নাপেইলাকোপুরি বাধাঅয়া তানুরে ডাকতারা। তানু এহানও হার-  
 পেইতার। বাপক পুতক দিয়গির কাম কামিলা আগর জুরাব দিতই।  
 অয়াও কিমেতে করতা, উপায় নেই। বাপক পুতক জীবনএহান ইমে  
 সাজেতএহানলো লালইতাইগো। নাহেয়া নাপিয়া থাইতার।  
 কুচ্ছসাধন এহানলো সাধু-সন্ন্যাসী অইলাইছতাও কুনদিনও দোর  
 কুপা পেয়া হুদেইলাইছ।

ঘর জিনকিহান বুলতে ইমে মাটির টুপিটাপি কতগ, ফতকরা  
 ফারাজিরা ফুতি—কুনোরকম লাজহান বিরেয়া চলিলতা আছে।  
 অয়াও তানুর মনে সংসার এহান কিসাদে করলে চলতইতা  
 বুলিল খালকরানি নেই। মানুরাংত উদারি আনলেগা দেনা হুরারিয়া  
 ঠার বচন ছনতারা, হাদি হাদিত বাকুরিও খেইতার। থাঙও তানুরাং  
 লাজ নেই। গাঙর মানুও কিতাঙে করতা—অইতার। গতিহান  
 দেখলাকোপুরি হুরারিয়া হুজে হুরারতাইহান হারপাহারপা দ্বি-আক  
 পয়সা উদারি দিতারা। হৌপাতর সময়তও কার কার বারিত্ত  
 আলু, মটর আনলাকোপুরি পুড়িয়া খেইতার। মৌর বারিত্ত মৌ  
 চরকরিয়া আনিয়া রাতিএহান চাবিয়া থাইতার। ঘীসুতে ইমে  
 এসাদে এসাদে ডাঙবাঙ করিয়া ঘাইট বছর কাটেইল। পুতকতে  
 বাপকর গজে গজে।

এবাকীও তানু জিগর কাদাত বয়া এহানহাবি আলু পোড়াত  
 লাগেছি। কার বারিত্ত খুলিয়া আনেছিগা কিগুইজানে। ঘীসুর  
 ঘরগিথানিতে নঙসাঙ অইল দৌ-অছে। মাধবও বছর আহান অইল  
 বিয়া করেছেতা। বহকএগ আয়া তানুর জঙেছে সংসার এহানত  
 হমেয়া জোড়াতালি দিয়া সংসারর খানিমানি ক্রী আহান আনানির



চেষ্ঠা আহানাত গই লাগলী । মাহুর কামতুম লেইসিবেইসি করিয়া  
কুড়িয়া বাপকপুতকরকা কুনোরকম সের আহানপারা আটার জুত  
করে পারিরী । বহকে আনিয়া দিরী হুৱাতহান পেয়া আরাকও  
আতহানি উড়িয়া বয়া খাইলা । বারো ডাঙরসানাতে—কুনোগই  
ঠেকিয়া কামে ডাকলে রোজির দামহান চুড়াগ লাককরিয়া মাতাই ।  
আজি অউ লক্ষীগপারা বহক শৌ জরমদে ছুরারিয়া মরণফাঙছে ।  
তানু এগদে বয়া খালকরতারাতাই মরে পড়লেগাতে ৰাইসাঙইলাং ।

হৌরকে ছালির ভিতরেত পুড়া আলু আগ নিকালেয়া বাকল  
বেলা বেলা মাতের—“হা, যাগানে আকুখুরুমকরে চেয়া আয়গা  
কিহান অইলীতা । দৌর বাতাস টাতাস লাগলি নেই কিতা নেই ।  
দশাআহান না । এবাৰা মেইপা ডাকলেও রূপাআহান নিতইগা ।  
মাধবর মনে নাগৈ সন্দই আহান হমেইল । কিৰাজানি তা ঘরে  
হামইতেগানেই বাপকে আলুগিহাৰি লমকবেবেলার । ফঙেদে  
মাতের—“ঘরে হমানি ডরপাউরি ।”

—“অবায় কিতার ডর এ, মিতে অরতে এপেইত আছু নাই ।”

—“তিও গিয়া চেয়া আইগা নে ।”

—“কতি আপাঙপাগৰ সাদানে দেৱ কথা এহানরে । হাৰপাছত  
তোৱ ইমা দৌ অইলী উবাকা মিও তিনরাতি নাখেয়ানাপিয়া  
হিয়রগত চেপালা দিয়া খাইলুতা । অউসাদে সেবা করলুতা মি ।  
কিন্তু এ কাকামেতে—হাজাৰ অইলও বহকনাই । মোৱে দেখলে  
লাজপেইতই । যেগর মেইথঙহান আজিপেয়াও হবায় চানা ছুৱাৰেছু,  
আজি ইমে এ অবস্থাত দেখগা বুলরতা । বারো এ অবস্থাত ফুতি-  
ফালিও খানি লেইলেক অর । মোৱে দেখলে যি অইতই । বহকমানুগ ।  
কিয়া হাৰনাপাৱতা ।”

—“খালকরউৱিতা এবাকা শৌগ অইলে কিহান করানি । ঘরে  
মহুৱ বিন্দুআগ নেই, থৌ আকছিটা নেই, বারো আদাও খানি  
লাগেৱ পাউরি কুনো আকতার যোগাড নেই ।”

—“আপ্নানও জুত অইতই। ভগবান নেইখাও। ভগবান  
যেতাই এবাকা পয়সা আহান নাভারা উতাই যাচিয়া  
মোরতাও নয়গো শৌ অইলা। ঘরে কানাদামুরি আগ নেয়ছিল।  
ভগবানর কৃপায় ইমে কিসাদে কিসাদে পার অয়া গেলুগা।”

অবশ্য যেতা দিনে রাতিয়ে কামেই করিয়া চলতারা তানুর  
অবস্থাও ঘীমুগাছিরাত নিয়াম তঙাল নাছি। তবে লেইরাপা ক্ষেতি-  
আলার দাবেয়া যে গিরকগি পালছি তানুর অবস্থাতে ইমে চলনসয়  
বুলানি য়াকরের। অউহানে এসাদে সমাজ ব্যবস্থাত মানুর মনে  
ঘীমুগাছির সাদানে তলপা মন হঙনি কিকখানও নাগই। বরং অউ  
দাবেয়া থছি ক্ষেতিআলা অউতারাততে ঘীমুগাছির ধারণা এতাহে  
যুক্তিবাদী। কারণ ক্ষেতিআলার পেটমারিয়া সমাজে বরাবালা  
অয়া পালছি অউতারাত তলে তাওয়া নাখায়া তানু-এহে ডাঙরিয়ার  
সাদানে চলতারা পারা। তবে কিয়া ডাঙরিয়ার সাদানে দেহুরেইয়া  
চলানি অউহানতে নুরারতারা হায়হান। দশগর সাদানে সম্মানও  
না-পেইতারা অউহানও হায়হান। কিন্তু সরল সাদাসিধা ক্ষেতিআলার  
ডেকি তানুরে বা-খানাতে ক্ষেমতাও নেই।

পুড়া আলুউতা বাপকপুতকে আকেইগি আকেইগি খেইতে আছি।  
কালিদরেন্ত তানুর পেটে ভাত নেই। আলুগি চিকনি নাঙনার।  
জিগন্ত কারতারা, আতর তারাহানল ঠগ্ন খাপারেয়া ফুদে ফুদে বাকল  
বেলেয়া খতাহানাত উড়া দিতারা। ধরভেতে পাঙ তপ্তাও নাছিল  
পারাখাও খতাহানাত দেনায়তে জু-এ কিতায় পুড়ের পারা। চাবানি  
নাঙনার ইরাদারা গিলেবেলেয়া রাইসাঙইলা। পেটগত গিয়া এমনও  
চিকইতই। গিলতে থাইলা বাপকপুতক সিঙনা দিয়া। আহিরপানি  
বেলেয়া খাঙকরলা।

ঘীমুএ খারহাদিত কুড়িবছর আগেকার ঘটনা আহান নিঙসিঙ  
অইল। জমিদার বাবুর বিয়াত বরযাত্রীগ অয়া গিয়া খাছিলগা  
হরাতহান মরেগেলেগাও না পাহরতই। মাতের—“আজিপেয়াও  
তারাত সা-সা করিয়া আছে পারা। কী খানা! রকম রকম খানি—



চাটনি, দই, মিষ্টি, ঝোল বারো তিননমুনার আঠাআঠা হৌ বারো—  
 লগে আসল ঘির পুরি। শৌগরাংত চিন্‌করে বুজন পেয়া থাক্‌নেই  
 সমানকরে বিলেইলাতানায়ে। আরতে কুনোদিনতে নাখেইতাঙাই-  
 তাকো। অউদিন পাছিলু হুঁরাতউহান আজি তোরাং বাঙ্গেয়া কিসাদে  
 মাতহু। অউতাউ বারো লেহাজোহা নেই—পারিল মাহি খানে,  
 না-না বুললেও জাতেয়া দিয়া যিতারাগা। আকয়া পেটরমা লমইতেগা  
 পানিছিটা খনার ফাম নেয়ইল। মোরতা নিয়াম সময় উবারা খানা  
 চিলইল। ঘরে আলয়া আয়া কুতিআহান পারিয়া দীঘল অইলু।  
 সাদেঁর দিলগ ডাঙর জমিদারগ।”

য়ারীহান হুনতে হুনতে মাধবর জুহান তিঙিল। মাতের—  
 “আজিকালি আমারে অউসাদে খরাকুরা নেয়ইললা পাউরি।”

—“এবাকাতে কইগই অউসাদে খরচ করতাইগ মাত? অউদিন  
 উতা আর আছেখাঙ? এবাকাতে হাবিও অঙকরে কর্ম হদানি  
 মনেইতার। বিয়াবারিতও অউসাদে খরচ করিয়া খরানির যোগাড়  
 নেই। শ্রাদ্ধকর্মও ইমে দৌ ঠকেয়া নমো নমো দিয়া এরতারা।  
 কাছিহানি হমারতা—নেই লেইরাপার পেটমারিয়া পুগেইগোফাকরলা  
 ধনপয়সা এতাহাবি কুরাং হারেইলাতা? আদায়র বেলাতে কড়ায়গণ্ডায়  
 বারো খরচর বেলাইতে নখর মলহানিও পড়ব কি নাপড়ব বুলতারা।”

“তিতে বাবা পাঁচ গণ্ডার চুয়া পুরি খা-খাইবে?”

“অউতাঙ জিঙে। মাতুরিনাই লেহাজোহা নেই।”

“মি অইলুইছতা পঞ্চাশহানতে হাটনহানাত লমকরলুইছ।”

“মিতে কিতা কম খাছুখাঙ? খিলায়ল করিয়া চা, অউসময়ত  
 বলিয়ে পাঙ্কালে ছেমগ পারা অছিলুগ। তিতে মোর আধাআধিও  
 নাছত।”

আলুখেয়া দ্বিয়োগিয়ে পানি পিলা। খানি থায়া জিগর কাদাত  
 উড়েছি আচালাহানিল অজাগরগির সাদানে পড়লা। বুধিয়া অউবাকা  
 পেয়াও ধরফর করিরা। চিকারী দিরা।



বিয়ান ফুঅইল । মাধব উঠিয়া ঘরর ছরারহান ঠেলেয়া ভিতরে হমেইল । বুধিয়া মরিয়া আছে । আহিগি উন্টিয়া দলাপোরাগি ছুকুলেছে । আ-করেছে খতাহানর গজে মাছি ফরদিতার । রাতিহান মাটিত উটনপাটন করানিয়ে গারিগহাবি ধুলিয়ে লেপেছে । শোঁগও আর ছনিয়ার মিঙালহান দেহে নুয়ারল ।

মাধব দাবদে ছুকুলিয়া বাপকরে বাগেইল । বাপকপুতক বুক খাপাড়া খাপাড়া কাদানি অকরলা । তানুর কাদানি ছনিয়া কাদা-বারার মানু দাবদিয়া আইলা । বাপকপুতকরে সান্তনা দিয়া এবাকাতে নিয়মর মানে মৃতাগর কিতা কিতা লাগের যেমন—চিঙখুশিআহান পুড়ানির রুক বারো আর আরতা জোগাড় করানিরকা মাতিয়া গেলাগা ঘরেতে পয়সা আহানও নেই ।

বাপকপুতক কাদে কাদে গাঙর জমিদারবাবুরাং তাল করিয়া গেলাগা । তানু হবধকরে হারপাছি জমিদারবাবুয়ে দ্বিয়গির ছেয়াগ-পেয়াও ভিটাগত না পরক বুলের । কারণ কাম করতাঙাই বুলে বুলে কতিও ঠকেইতা বারো চরকরতে ধরা পড়িয়া মেরাক মেরাকে কতিও বাকুরি খেইতা । অইলে অইলেও আজিদিনে বারো তানু জমিদার-বাবুর জাঙে পরলাহা । জমিদারবাবুএ আংকের—“কিতা অছেতা ? কিয়া কাদরাইতা ? হাদিএহানতে তুমার চিকাগি পেয়াও দেহানি নেই । না গাঙ এরেদিয়া যানা মনেইলাইতা না কিতা ?”

ঘাসু গলেবস্ত্র অয়া দীঘল হমা আহান দিয়া মাতে—“হজুর—আমারে বিপদ এহানাত্ত উদ্ধার করেদে । মোর আকখুলি বহক দৌ অইলী । রাতি এহান লাংনা করিয়ারগো । বাপকপুতকর ঘুম নেই । আমার সাবেকে যেহান পারলাং হজকপাত খরেইলাং । লমইতেগা আমারে ছুংখর সাগরে বেলাদিয়া ঠকেয়া গেলিগা । হজুর আমারে ভাতগি দেনার মানুগ পেয়াও নেয়ইলা । সংসারহানহাবি পানিত বাহিলাং আপনার গোলাম হজুর—এহানর উপায় আপনি ছাড়া আজি কুঙগই করেদিতাইতা । যেহানি আছিল পয়সাহানিও হজকপাতে খরচ অইল । আপনি কৃপা নাকরলে আজি মৃতাগর শেষ কিরাকর্ম



কিসাদে করতাঙাইতা ? আপনি ছাড়া আর আমারতা কুঙগ  
আছিতা ? আজি দিনে কারাং আত পাতাঙাইতা-হুজুর ।”

হুজুরে তানুরে ধমক মেইছা দিলেও আসলে জমিদারগ কিন্তুমান  
দয়াবানগ । গালি হনতারা তাতে তানুর স্বভাবে । হারপার এ চামার-  
এগরে পয়সা দেনা মানে অপাত্রে দান । মনে মনেও খালকের ধমক-  
আহান দিয়া নিকালাদিতু না কিতা বুলিয়া । হুতুমে ডাহিয়ার  
অউপেইত্তে পাতাঙ নেই । আজি বিপদে পড়িলখাঙতে জাঙে আতে  
ধরেরতা-চমার । মাতের যারীহানতে এবাকা ধমকমেইছা দিল কাকাম-  
হান নাইল । রূপা হুহান আনিয়া মুঙে উড়াবেলাদিয়া গেলগা ।

স্বয়ং জমিদার বাবুএ রূপা হুহান দান করল খাঙতে গাঙর  
আর আর বেপারী মহাজন রূপা নাদিয়া লিত পারলাতা ? জমিদারর  
নাঙ ধরে ধরে কুনোগরাংত দ্বিআনা চার আনা করে করে আদায়  
করানি অকরলা । ঘট্টা আহানরমা পাঁচ টেকার চুয়া পুলকরেবেললা ।  
কতগরাংত পুড়ানির দারৌ, কতগরাংত চউল ডাইলও আদায় অইল ।  
মোটা মোটি জুতজাত আহান করিয়া বারবাজিত বাপকপুতক চিঙখুস্বী-  
হান লনাত বাজারেদে মালইলা । কতগই বারো বানাপেয়া  
শ্মশানর বাহা কতগ ছেদাদেনাতও গেলাগা । তেইরে বানাপাকুরা  
গাঙর দুগ-আগ বেয়াপা উনা অনিত আহিলা । বেয়াপার মরণ ।  
তেইরকা বুলতেগা আজি তানুর আহিত আহিরপানি ফুটাগও  
বেলা দিলাতা ।

আটে আটে বাপকপুতক যারী দিয়া যিতারাগা — বাজারে  
কৌঅয়া ঘীসুএ মাতের — “হায়দে মড়াগ পুড়ানিরকাতে বাহা দারৌর  
ব্যবস্থাতে অইলনাই নাগইতা” ?

— “বাহিয়া যিতইগা এবাকাতে চিঙখুস্বীহান লইলে লমইল ।”

— “নিয়াম দামীউতাত গিয়া কিতা করতাঙ সস্তা আহান বিছারেয়া  
লইকগা ।”

— “হায় । মড়াগ পুড়াত নিতেগা নিতেগা সেকাহানও অইতই ।



আশারগতে কুঙগই ফুতিহান খিয়াল করতাইগ ।”

— “অনথকপা রীতিহান । জিংতা অয়া থাইতেতে দেহাগ বেড়ানির তেনা আকচিলাও নাপেয়ার মড়ানির পিছেদেতে বারো ছুয়া ফুতি লাগের । আহানিও, আহের ।”

— “অউহান বারো মডাগর লগে পুড়িয়াও যিতইগা ।”

— “আজি পেইলাং পাঁচটেকা আগে অইলইছতাও হজকপাত খানি খৌরা পারলাওইছ ।”

এসাদে আগরে আগয় মন বুঝাবুঝির চেষ্টা আহান করিয়া এ ছকানেত হৌ ছকান বুলতারা চেইতারা । তানুর মনমত ফুতিহান বিছারেয়া নাশেইলা । সেকাহানও অ-যারগা — আটতে আটতে পেইরাক মদর ছকানহানর মুঙে উবাইলা । আগরে আগয় মেইথঙ চা-চি দিয়া ভিতরে হমেইলা । এহান অইতইহান তানু দিয়গিয়ে আগেত হারপাহারপি অছি পারা । খানি উবায়া এগদে হেগদে চেইলা কিহান করতা — খালকরিয়া দ্বিমন দিছা অইলা ।

ঘীষু হাতে হাতে ছকানী অউগরে ইঙ্গিত করল —

“সালুজী আমারতাও বইতল আগ ।”

লগে মদর চাট বারো মাছ ভাজা লয়া দিয়গিয়ে রেকহানাত বয়া মনর আনন্দে পিনা অকরলা । পেটগত ছিটাআহান পড়ানিয়ে আহিগিত রঙ ধরল ।

ঘীষু — “চিঙখুন্দি লয়াতে কিরা করতাও ? মরাগর লগে ছালিগ অইতই । আপ্পানে পয়সা খরচ করিল পথ না-পাছিতা ।

মাধব শৃগুহানাদে মুরগ তুলিয়া তা যেন কুনো পাপ বা কুনো অপরাধ নাকরেছে এ ভাব এহানল দৌ-সাকী থয়া মাতে — “মানুএ দান করতারা, বামুনবেওতে কত হাজার হাজার দান করতারা, তানুরে দান করলে মডাগই পার বুলিয়া, পরলোকে গিয়া কুনোগই দেহেছি-গাতা ? যেতা দিয়ার এতা তানু পাছি বুলিয়া মাতে পারবা ?”

ঘীষু — “ধনপয়সা আছি অউতাই তানুর শ্রাদ্ধকর্মত হাজার হাজার দান করতারা । আমিতে লেইরাপা কাঙাল আমি অউসাদে পয়সা উড়া পারতাওইতা ?”



—“কিন্তু মানুষ এ বারো চিঙখুশিহানর কথা আংকরলেতে কিতা বুলতাঙাই ?”

—ঘীশু আহিয়া মাতের—“অউহানরকাও খালকরিয়া মররগাতা আংকরলে মাতাঙায় পকেট মারে দিলা। আমার লেইপাকে নেই নাপেইলাং। এহানও হায়হান আকগও আমার কথা ঠাচা নাকরতাই। তানু ঠাচাকরলা নাকরলা আমারতে কিতাঅইল। চেইছ অউতাই বারো পয়সাও দিতাই।”

মাধবও আহের। কিহানরকা আহিল তা জানে। আজিকার তানুর কপালে কাইল চাইতএগ কুনোদিন ঠাচাও নাকরেছি। মাতের—“বাবার বহকতে কিয়া বেভাররগো আছিল। মড়িয়া পেয়াও আমারে এরে চা খৌরেয়া যেইরিগাতা।”

প্রায় আধারইতল লমকরলা। ঘীশু দ্বিসের পুরি আরাকও লনাত দাপেঠেইলো। লগে বারো চাটনি, আচার। মদর দুকানর ঠিক মুঙামুঙি খানার দুকানহান। মাধব দাবদে গিয়া পাতা দুহান লয়া আনলগা। আরাকও দেড় টেকা খরচ অইল। আতে মাত্র দ্বিদিন আহানার চুয়া থাইল।

যেসাদে বাঘগয় শিকার করানির পিছে তাপ্প শিকারগ মুঙে থয়া তৃপ্তি অয়া খার আজি তানুর বাপকপুতকরতাও অউহান আছে। আজি তানু বেপরোয়া। করলা কাম এহানরকা উচিত কি অনুচিত খালকরিল সময় নেই কারাঙও মাতিল দরকার মনে নাকরতারা। বারো এহানরকা তানুরে বদানাম করতাই বুলিল ডর নেই। অউহানতে কিয়া তানু পয়লাত্ত জয় করিয়া আছি।

ঘীশু দার্শনিকর সাদানে মাতের—“আজি আমার আত্মাগই পেয়ার তৃপ্তি এহানে কি বহকউগরতা পূণা নাইতই মনে কররতা ?

বাপকর কথাহান ইলয়া মাধব ভক্তিশ্রদ্ধায় গলিয়া মাতের—“সইনেই অইতই। কত পূণ্যফলে আজি তেই আমারে পাছে এহান হে ঈশ্বর তিতে অন্তর্যামী। তেইরে বৈকুণ্ঠধামেতে নিয়া যিছগা শুভ।

আমি ঠাইগ সকা বর দিয়ার । আজি যেসাদে আমারে ঘাড় ঘাড়  
মোকরে খোঁরেইল এহান আরতে জীবনে কুনোদিন পেইতাঙায়  
বুলিল আশাতে নেই ।”

খানি থায়া মদর ঘোরর ভিতরে মাধবরতা পেইরাক থিয়ালহান  
হমেইল—

—“হায়দে বাবা আমিওতে আকদিন না আকদিনতে তেইর  
অউপেইত না যিতাঙাইগাখাঙ ?”

ঘীসু না টটরার । পরলোকর কথা খালকরিয়া এবাকার  
পেইতার। আনন্দহান মাটিগ করানি নামনার ।

—“চিঙখুশিহান কিয়া আমি নাতলাঙবুলিয়া তেই যদি হোঁপেইত  
আঙকরিরী, কি জুরাবতে দিতেই বাবা ?”

—“তোর মুরগ ।”

—“আঙকরানিতে কিন্তু আঙকরতই সইনেই ।”

—“তিতে কিসাদে হারপেইলেতা তেইর চিঙখুশিহান নাপেইতই  
বুলিয়া ? মোরে তি কিগো পারাবেইলেতা । ষাইটবছর এহান ইমে  
মি লাহলে ঘাস কাপলু বুলবেনাই । চিঙখুশিহান তেই এমানেও  
পেইতই বারো হবা আহান পেইতই ।”

মাধবরতা ঠাচা নাইল । আঙকরের—“কুঙগই দিতইতা ?  
পয়সাহানিতে হাবি লয়করলে । তেইতে মোরেহে আঙকরতই ।  
বিয়াতে মিহে করেছু নাই, হেদিগত সিন্দুরতে মিহে পিদাদেছুনাই ।”

ঘীসু ফিঙকো সোঁঅইল—“আহোঁবার মাতুরি নাই, চিঙখুশিহান  
তেই পেইতই—পেইতই এরে মাতলুতাহে ।”

—“দেকুরাহে কুঙগ ?”

—“যেতায় এবাকা পয়সা দিলা অউতাই বারো দিতাইতা । তবে  
হায়হান এচলতিতে আমার আতে না পড়তই ।”

রাতিহান যত ডিলযারগা মদর ছকানে ভিড় . নিয়াম অনি  
অকরল । কুনোগই বেশুরে এলা ছুটাছি, কুনোগই লাহলে বকর বকর



গুজুরতারা। আগরে আগই কলকরিয়া হকচেলয়া কাদতারা। এসাদে  
 নেশার ঘোরে হাবির আহিত রঙ লাগেছে। মদেত্ত জিঙে তানুর এ  
 ভঙ্গি ভাঙ্গি খুশীর হাওয়াহানেই ঢুকানহান গরম আছে। জীবনর  
 হুঃখ বারো হতাশায় মানুএতারে আজি এপেইত পুলকরেছেতা।  
 ওহাক আহানরকা অইলেও তানু পাল্লরতারা। পাল্লরতারা নিজরে।

বাপকপুতক অউবাকা পেয়াও ডেস্‌মারিয়া—পিনা ত লাগেছি।  
 হাবি তানুরউগদে আহি বিদেয়া চেয়া আছি। খালকরতারা—লাকর-  
 তারানায়ে, কপালহবা বুলিলহান পুরা বইতলগল বহেছি।

পেটবুজে খেয়াপিয়া যেতা লেময়া থাইল অউতা মাধবে ভিখারী  
 আগরে দা দিল। নঙমাঙ অইল তানুর উগদে জিনধর চেয়া জুহনল  
 অটগি তিঙা তিঙা সেপ গিলা ত লাগেছেগ। মাধবরতা আজি ভিখারী  
 আগরে সামান্ত উচ্ছিষ্টহানি দান করিয়া হারোহানে বুকগ ফুলিল।  
 ‘দান’র গৌরবহান জীবনে পয়সা তার বুকগত বাজিল পারা।

ঘীসু ভিখারীগরে মাতের—“নেগা যৌকরে খাগা, বাবো দিলগ খুলিয়া  
 বরতে দিছ। য়েগর নাঙহানল আজি কামেইলাং পয়সাহানি, তেইতে  
 হাংকাত্ত দৌরখয়া পেইলগা। তবে তোর বরহানতে সইনেই তেই  
 পেইতই। এতা তেইর কষ্টর ধনহানি না।”

মাধব বারো শূণ্যহানাদে চেয়া মাতের—“বাবা তেই সইনেই  
 বৈকুণ্ঠধামে যিতইগা, অউপেইর রাণীগ অয়া থাইতই।”

ঘীসু উঠিল। হারোহানে থাইবপথ নাপার—“হায়বাবা তেই  
 বৈকুণ্ঠই যিতইগ। তেইতে কুনোদিন কারও তিন নাকরেছে। কারাও  
 লাল নাছে। মড়িয়াপেয়াও আমার জনমকার খোঁরাঙহান থুঙকরে  
 দিল। তেই বৈকুণ্ঠে নাগিয়াতে অউরে লেইরাপার পেটমারিয়া  
 সাধুছায়া নিকাদিন মানু দেহুরেয়া গঙ্গাস্নান করে করে মন্দিরে মুরগ  
 খেঙকরতারা অউতাই যিতাইগাতা।”

তার এ ভক্তির ভাব চুটির নাথাইল। মনর দরফর অউহানেই  
 নেশার লক্ষণহানছাং। নেশাহান ছুটানিয়ে হতাশ বারো হুঃখ  
 মনহান ছেয়া হদেইল।

“কিন্তু বাবা, জীবন এহান কতিও লাই-লাকনা এতা পা  
গেলিগাতা, মরতে পেয়াও অগেলিগা লাংনাএহান ।” মাধব রৌ  
মেলিয়া জুরে জুরে কাদানি অকরল ।

ঘীষুএ তেমজার—“কাদিয়াতে কিতা করতে, এ কঠিন সংসারর  
মায়াজালেত্তে তেই আর মুক্তি পেইল । মহাভাগ্যবতীগ, অউহানে  
এমাটিক ত্বরাকরে মাহাবন্ধনহান ছিড়িয়া গেলিগাতা । চিন্তা নাকরি—  
আরহে হারৌ অইঙতে নাবুলিয়া—কাপকপুতক লৌদিয়া এলা আহান  
অকরলা—

“ঠগিনী কেঁও নয়না বাকারে । ঠগিনী ।”

অর্থাৎ—“ঠগিনী ঠমক দেহুরেয়া কিয়া আহির পট মারউরিতা  
ঠগিনীরে ।”

মনর আনন্দে এলাহান লইল । কাদার বারার হাবি পুলয়া  
তানু এ লীলাহান চেইতারা । এলা দিতে এলা দিতে নাছানি অকরলা ।  
লমইতেগা তাত্বনুতাত পঢ়লাগা । নেশার ঘোরে তালহান মাংকরিয়া  
বাপকপুতক ধরাতলে দীঘল অয়া পড়লা ।

মূল—প্রেমচাঁদ

অনুবাদ—শান্তি সিংহ

:-:

প্রেমচন্দ্র—(১৮৮০—১৯৩৬) উত্তর প্রদেশর বেনারসর  
লমহীতে তাঁর জন্মস্থান । হিন্দী গল্পর অমর কথাশিল্পী প্রেমচন্দ্র ।  
প্রাচীন উপাখ্যান বারো যারীর পথগত্ত থেই করিয়া অতি সহজ  
সরল গাঙর ভাষায় মানুর চরিত্র গাঙর চিত্র তুলিয়া ধরে  
দেছিল । যেহানরকা তাঁ হিন্দী সাহিত্যজগতে থাইলতা অমর  
অয়া ।



## অগ্নি মন্ত্ৰত দীক্ষা দেই

নরসিংহপুৰ লয়াগত পয়লাই প্ৰকাশ পাছিল পত্ৰিকাশোঁআহান ।  
নাঙহান 'ইকরা' উহানৰ কতবছৰৰ ধাংনাত প্ৰকাশ পেইলো  
'ভূবন মেলা' । তিনহান মাত্ৰ সংখ্যা নিকুলানিৰ ধাংনাত অদ্যাবধি  
পেয়া বন্ধ আছে । কাৰণহান অইলতাই আমাৰ জাতীয় চৰিত্ৰৰ  
মানসিক শক্তিৰ অভাব । লক্ষ্য ফৌঅনিৰ নাপ্পাল আমাৰাং নেই ।  
উহানেতে পাৰায় পাৰায় উছুটন খানাত লাগেছি । লয়অইতেগা  
এমন পৰ্য্যায়ে ফৌঅইলাংগা আমি অস্তিত্ব আৰ জিংতাকৰে  
নারতাঙাই পাউরি ? আমাৰ জাতৰ মুণ্ডে মৃত্যুৰ পদধ্বনি — আৰ  
ডিল নেই — মেইতেইয়ে আজি তানু মণিপুৰী অয়া পাল'ামেটে  
মণিপুৰী ভাষাৰে অষ্টম অপশীলভুক্ত কৰানিৰ পক্ষে বিল পাশ  
কৰতাই । পাশ অনাৰ লগে লগে বিষ্ণুপ্ৰিয়া মণিপুৰী জাতি পৃথিবীৰ  
ইতিহাসেত মিমুত অয়া যিতাইগা ।

কিন্তুমান আচানক ! দ্ৰৌপদীৰে বিবস্ত্ৰ কৰানিং হুঃশাসনে  
ফুতিহানাং ধৰল উপেইত ভীষ্ম পঞ্চপাণ্ডব যেসাদে প্ৰতিবাদ কৰে  
নারিয়া ভূৰ্যোধনৰ মুণ্ডে সেনাপকৰ সাদে ককাৰা অছিল ঠিক আজি  
আমাৰ মুণ্ডে ও ছবিউহান সাতয়া উঠিল । বিষ্ণুপ্ৰিয়া ইমাৰ পৰিচয়হান  
আজি বেশ্যাগোৰ ৰূপে কলঙ্কিত অইরী উপেইত তেইৰ জিপুতে বোবা  
অয়া পিলিক পিলিক চেয়া আছি । আমাৰ ৰাজনীতিবিদে পাৰ্টিৰ  
কথালো বিভূলা । ধৰ্ম্ম আটেকুৰায় ৰাধা কৃষ্ণৰ প্ৰেমৰ চিন্তাত পাগালা ।  
শিক্ষক সমাজ টিউশানিলো সময় নাপেইতারা । ছাত্ৰ ছাত্ৰী সমাজ  
ভিডিও চেয়া সানি দেউল, সঞ্জয় দত্ত, হেমামালিনীৰ গুণগান গেয়া  
পথেদে আটতারা । খেলার ৰাজ্যৰ ক্ৰিকেটাৰ — সুনীল গাভাসকাৰ  
য়্যারীলো পঞ্চমুখ । বেয়াপা হাবি টি, ভি, সিরিয়েল চেয়া মোহ অয়া  
আছি । হাদিং গাঙৰ বুজনে আংকরতারা 'আমাৰ ঠাৱহানতে কীতা  
অইলতা ?' ইমে এহানি কথা । উতাৰ হাদিং পূৰ্বপুৰুষ মুক্তি দেনাৰ  
সালে কাকালিত ৰূপা বাধিয়া তীৰ্থযাত্ৰাত সালছি ।

আচানক ছবিআহান আমার মুণ্ডে বাহিয়া উঠেছে। এ অবক্ষয় এহান কিয়া আহিল ? এহানাত মুক্তি পানার দিশাগো কুংগই ইলকরে দিতৈ ? এতাকিতা প্রশ্ন আমার মুণ্ডে উপস্থিত। এহানর প্রতিবিধান নাকরলে পিছেকার বংশই আমারে ক্ষমা নাকরতাই। এবাকা যত্ববংশর সাদে দলাদলি করিয়া ধ্বংসর মুণ্ডামুণ্ডি।

ইতিহাস আলোচনা করলে দেহিয়ার বৃটিশ জাতএহানর দুর্দিনর তানুজা আগো তানুর মুণ্ডে দেহাদেছিল। দ্বিতীয় বিশ্বযুদ্ধর হাক্তাকে বৃটিশ দ্বীপপুঞ্জ চানিয়বারাদে, হিটলার সাবমেরিন পাহারা দিয়া আছিল—উদ্দোশ্য আছিলতাই বাহিরেত্ত ‘এসিটোন’ আনানির পথগো বন্ধ করানি। এসিটোন নাইলে কোন মাইন, গোলা-বারুদ, বিস্ফোরণ নার। সুতরাং ও জিনিষ নাপেইলে যুদ্ধহান আপ্পানেউ বিস্ফোরকর অভাবে বন্ধ অইতৈ। ও দুর্দিনে বৃটিশ প্রধান মন্ত্রী মিষ্টার লয়েড জর্জ নিয়াম খালকরিয়া সমর বিভাগর ইহুদী বৈজ্ঞানিক কাইম ভাইজ-মানরে মাতেছিল—‘কাইম ভাইজমান, আমার মুণ্ডে এবাবা হুগো পথ। আগো অইলতাই যুদ্ধ করিয়া মরানি, পিছেকার উগো অইলতাই জারমানিরাং আত্ম সমর্পন। কিন্তুমান তি যদি কৃত্রিমভাবে এসিটোন, আবিষ্কার করে পারর উহান অইলে আমার দেশ, আমার জাত রক্ষা অইতৈ।’ বিশ্ববন্দিত বৈজ্ঞানিক ও ঘোর বিপদর সময়ে এসিটোন আবিষ্কার করিয়া দেশ রক্ষা করেদেছিল। যুদ্ধর থাংনাং তারে সভা-হান ডাহিয়া মান করেছিল। উপেইং তারে মাতেছিল—‘কাইম ভাইজমান, আমার দুর্দিনে আমারে যে উপকার করেছিলে উহানরকা সমগ্র বৃটিশ জাত এহান তোরাং শ্বনী। এবাকাতে আমার ক্ষমতারমা যেহান আছে উতা তোরাং দিতাঙাই—মাতিক কিতা চেয়ারতা ?’ উপেইং ও গিরকউগই নিজর জাত ইহুদী এতা দেশ নেয়া ডেই ডেই-হারা দিতারা এহান নিংশিং অয়া নিজর আত্ম-সুখর কুনোতা নাচেয়া হুদা মাতেছিল—“মোর ইহুদী জাত এহানরকা মাটি টুমাআহান চাউরী।” এবাকার ইজারাইল ও প্রার্থনার ফল স্বরূপ পৃথিবী বিখ্যাত রাজ্য।



আমার এ দুর্দিনে, সমাজের চিন্তাশীল মানুষেরা চেইয়ার উদ্ধারের  
মিঙালপা পথ। আমি যেন বুঝা করে যুদ্ধত উবা অনি পারানি।

আমার রকতে আহক কত্রিয়র রকত। জুলিয়াস সিজারে  
যেসাদে মাতেছিল—‘কাপুরুষর মৃত্যু বহুবার কিন্তু বীরর মৃত্যু  
আক্খুরুম।’ নেপোলিয়নে, বরফে আচ্ছাদিত আলপ্পর্বত দেহিয়া  
ডর নাপেয়া সাহসে বুকগো দরা করিয়া অতিক্রম করানিঃ উবা অয়া  
তরোয়াল হেইককিয়া সৈন্তহাবিরে মাতেছিল—‘আলপ্পর্বত মরাং  
মুরগো নঙা।’ লগে লগে সৈন্তহাবিয়ে সঞ্জীবনী মন্ত্রহান ছনিয়া পর্বত  
অতিক্রম করেছিল।

আমার জাতীয় চরিত্ররমা লাগের এবাকা দুর্দর্শ চরিত্রর নেতা।  
যেগোর কথায় রকতে রকতে দাবদক্ জির হোতগো। যেগোর এলার  
সুরে লৌদকা অস্তিত্ব রক্ষার সংসাহসী সংগ্রামর জয়ধ্বনি। ধর্মবীর  
বারো মাত—‘অজ্জুন, যুদ্ধ কর, মরলে স্বর্গ লাভ, জিংলে রাজ্য লাভ  
—মরলেও লাভ জিংলেও লাভ।’ রাজনীতিবিদ্ চাণকার সাদে  
লোশিং খেলেই। শিখগুরু গোবিন্দ সিংহর সাদে বুঝা অগ্নিমন্ত্রত দীক্ষা  
দেই আমি যেন অস্তিত্ব রক্ষাত প্রাণ বলি দিক্। দিকে দিকে আকাশে  
বাতাসে, ধ্বনি প্রতিধ্বনিত মুখরিত অক্—‘জয় বিষ্ণুপ্রিয়া মণিপুর।’

ইন্দ্রকুমার সিংহ

—X—

ব্রজেন্দ্র কুমার সিংহর

‘এলার খুংতল’

বারো নিকুলিল। এরে লেরিক এহানিও পেইতাঙাই—

‘পুংলল’, ‘মেইকেই’, ‘কণ্ঠগিরো’

ধনঞ্জয় রাজকুমারর বুঝা কবিতার লেইরিকহান—

‘হপনর বাবুয়ানি’

পূর্ণিমা লেইরিক লেইসাং

গুরাহাটি

## “ ভুয়ালকা পুরস্কার ”

কলকাতার সৌরভসংস্থার পক্ষত বহরহান লেহে সংগীতরমা গুণীজন আগরে এ সম্মান পুরস্কার দেনা অর । এমারীও সৌরভর ষোড়শ ভুয়ালকা পুরস্কার একুশ হাজার টাকা দেনা অইল । মণিপুরী নৃত্যরমা উজ্জল জ্যোতিষ্ক গুরু বিপিন সিংহরে । কলাকুণ্ড ভবনে অচুষ্ঠান আহানর ঠোরাঙ করিয়া নৃত্যগুরুর আতে অমিতাভ চৌধুরী এ পুরস্কারর চেক্‌হান বারো জ্ঞানপ্রকাশ ঘোষএ মান পত্রহান তুলেদিল ।

মেলা পুরস্কার আগেদে গিরকে পেয়া গেলগা অউতারমা ‘কালিদাস সম্মান’ বারো “ একাদম্বিক পুরস্কার ” স্মরণীয় ।

হায়হান আমার মণিপুরী জাতরমা উজ্জল জ্যোতিষ্ক গুরু বিপিন সিংহ । নিজর মিঙাল নিজরে ভালকরিয়া জগতরমা মণিপুরী নৃত্যরে প্রকাশ করে দিল । আমি মণিপুরী গিরকরেলই গৌরবাস্থিত । কনাক কালেত্ত নানান ঘাত প্রতিঘাত, লাই লাকনা পেয়া আজিকার এ পাঙচেল এগত ফৌ-অনি এহান গিরকর নিজস্ব কৃতিত্বহান । ‘মানুহে ছুরারিলতা কিতাও নেই’ এহান গিরকে নিজর জীবনহানল দেহুরেইল ।

গিরক কাছাড় জিলার শহরতলী গাঙর সিঙ্গারীবস্তীর বিষ্ণুপ্রিয়া মণিপুরী সমাজে জরম । ঘরেত্ত নুকুলিয়া নানান গুরুরাং শিক্ষা লয়া কলিকাতাত আহিল । অউপেইত মাজম মেনকার লগে পরিচয় অয়া খাঙেলা যাত্রা করল । এ যাত্রা গিরকর পয়লাকার কাকেইহান বুলানি য্যাকরের । খাঙালাত্ত বোম্বাই । জাভেরী সিঙ্গারস্‌র লগে যোগাযোগ, গুরু বিপিন সিংহর গৌরবর চূড়াত কানার কেইরাকহান তানু তুলিয়া ধরে দিল । দীর্ঘ ৩০ বছর পরে বারো কলিকাতাত আহিল । আজিপেয়াও কলিকাতাতেই আছে । ছর ঘরশৌগর বাঙেদে বাতেদে বই, চারিয়বারাদে বইর, সাগরে নিজরে বুয়েয়া থেছে অউহানেই তাঁর আনন্দ, তাঁর সাধনা । এ অক্লান্ত সাধনার ফলে আজি মণিপুরী নৃত্য ভারতর শাস্ত্রীয় নৃত্যরমা বলিষ্ঠ ফান লইল । ভারতর নাট্যশাস্ত্র বারো মণিপুরী নৃত্যর ভিত্তিভূমি গৌড়ীয় বৈষ্ণব



গ্ৰন্থৰ সজীৱ বাৰো তাল বিষয়ে তুলনামূলক বিচাৰে কাটেইল দীৰ্ঘ পঞ্চাশবছৰ কাল গিৱৰ্ক হাবিত জিঙে ডাঙৰ মনস্থিত। শাস্ত্ৰজ্ঞানৰমা গভীৰতা বাৰো গবেষণাৰ একনিষ্ঠ।

কিন্তু দুৰ্ভাগ্য এ জ্যোতিষ্কৰ আকৰ্ষণে নয়গ গ্ৰহৰমা আমাৰ বিষ্ণুপ্ৰিয়া মণিপুৰী সমাজ আকগ গ্ৰহও ফাম লনা চুৱাৰলাও নিজৰে নিজে বুলে বুলেই আমি সন্তুষ্ট। বছৰে বা দ্বিবছৰে আট নয় হাজাৰ খৰচ কৰিয়া উঠানে বা মালঠেপে মানসিক ৰাস আহান কৰিয়াই আমি নিজৰে ধন্য মনে কৰিয়াৰ। সংসাৰৰ নানান বিনান খৰচৰ চাপে অউহানও বছৰ ঠেলেইতে ঠেলেইতে লমইতেগ। আৰ্তি আহানাত সামৰ।

মণিপুৰী নাছা বা-ৰো ধৰ্ম আহানাত আহান খেইকৰিল উপায় নেই। আমাৰ যেহান ধৰ্মহান অউহানই নাছাৰ মাধ্যমে প্ৰকাশ পাৰ সুতৰাং আমাৰ জীৱন যাত্ৰাৰ লগে সমানতালে যেহান সজ লছে, এ নৃত্য সম্বন্ধে হাবিৰতাও গভীৰ জ্ঞান থানা লাগেৰ। জ্ঞান পেইতে গেলগা উপযুক্ত শিক্ষা কৰানি লাগেৰ সাধনা কৰানি লাগেৰ। যদিও ৰকতে মণিপুৰী নৃত্য অতি স্বাভাৱিক অয়া তিলয়া আছে, যেসাদে নিংশাহানৰ লগে প্ৰাণহান। অউহানে নৃত্য এহানৰে যতন কৰিয়া হিকিয়া শিক্ষাৰ অঙ্গ আগ বুলিয়া তুলিয়া ধৰানি নাজানলাও।  
তঃখহানতে এহান।

### বৃত্তিৰ ঘোষণা

কোহিমাত হুঙছে বিষ্ণুপ্ৰিয়া মণিপুৰী ৰেলফেয়াৰ ট্ৰাষ্ট (BIMWET) নাঙৰ সংস্থাই সিদ্ধান্ত আহান নেছিগা যে আসাম বাৰো ত্ৰিপুৰাবাসী বিষ্ণুপ্ৰিয়া মণিপুৰী ছাত্ৰ-ছাত্ৰী যেতা ১৯৯২ সালে H S L. C. বা সমতূল্য পৰীক্ষাত্ কমপক্ষে প্ৰথম বিভাগে পাশ কৰতাই উতাৰ ভিতৰেও আৰ্থিক বাৱাদে নপ ছাত্ৰ/ছাত্ৰী আগৰে মাগাকী ৰূপা ১৫০ কৰে বছৰ আহান বৃত্তি দেনা অইতই। পৰীক্ষাৰ ফল নিকুলানিৰ লগে লগে ছাত্ৰ/ছাত্ৰী/অভিবাৰক মাৰ্কসিটৰ কপি আহান সহকাৰে তলৰ ঠিকানাত দৰখাস্ত দেনাৰ হেইচা জানানি অইল।

সভাপতি

**BIMWET**

**C/o.- R. L. Sinha**

**Asstt. Dev. Commissioner Planning Deptt.**

**Kohima-797001, Nagaland**

চিত্ৰ

পিছেকার সংখ্যা সমালোচনা বিভাগ  
এহান প্রকাশ পেইতয় ।



ভারতে শতকরা দুই-এক সাড়ে চারিভাগ মানুষ পঙ্গু। এপেইত পঙ্গু বুলতে হুদা জাঙআত, বিকৃতি নাগৈ। দেহগর যে কোন অঙ্গ আগর বিকৃতি যেমন—আহি তেরা অনি, মাত নেয়নি ইত্যাদি। মোট জনসংখ্যার প্রায় সাড়ে চারকোটি মানুষ এহানর শিকার। বছরে সাতলাখ এসাদে পঙ্গুমানু বাড়তারা। সুতরাং বিষয় এহানরে ছরকাং করে দেহানি থকনেই।

হাবি কিন্তু জরমত পঙ্গু নাগৈ। অনেকগ ডিপথিরিয়া, হুফিংকাশি, ধনুষ্ঠকার, পোলিও বারো যক্ষ্ময় আক্রান্ত অয়া মরিল অউগতে মরতই কিন্তু ভাগো দিয়া যেগ কোনরকমে জিংতা অর অউ শৌগ পঙ্গু অনির সম্ভাবনা নিয়াম।

এহানর আরাকও কারণ আছে। আজিকালি বিয়ার লগে লগে শৌ পানা না মনেইতারা কোন কোন দম্পতি। কতবছর তানু আগরে আগয় একান্তভাবে পানা মনেইতারা। অথচ তানুর ইচ্ছার বিরুদ্ধে ২/৩ মাস পরেই দেখলা তেই গর্ভবতী আছে। শৌগ নষ্ট করানিরকা নানান হজকপাত বডি ইত্যাদি খানার চেষ্টা করিয়াও যে শৌগ নষ্ট নাইল অউ শৌগই এ ছুরারার শিকার। মালকবাপকর দুর্ভাগ্য বয়া আনেইতই। সুখর সংসারে শৌগ ডাঙর বাধার সৃষ্টি আহান।

বারো এহানর লগে আরাকও কথা আহান—গর্ভবতী বেয়াপা আগয় যদি কোন জিনিষ আহান খানা মনেইরি, মনহানলতে মনেয়াও ফঙকরে মাতে ছুরারিয়া গোপন খনার চেষ্টা করিরি। পয়লাকার 'ইশু'ত কোন কোন বেয়াপা লাজপেইতারাহান। ফলে অনেক কাফামে আহিতই শৌগ পঙ্গুতর শিকার অনার সম্ভাবনা নিয়াম। আয়ুর্বেদ শাস্ত্রই মাতে গেছেগা কথাহান।

সুতরাং যেকোন মালক বাপকর কর্তব্য—সুস্থ সবল শৌ আগ পানার যত্ন নেনা উচিত। অউগই তানুর ভবিষ্যত, অউগই সমাজর বারো দেশর ভবিষ্যত।

## বিষ্ণুপ্রিয়া মণিপুরী ভাষা বারো ভারতীয় সংবিধানর ৮ম তপশীল ।

বিষ্ণুপ্রিয়া মণিপুরীর বর্তমান পরিস্থিতিতে, মৈতেয়ে তানুর ঠার-  
হানরে মণিপুরী বুলিয়া ৮ম তপশীলে নিয়া গেলগা আমার ভাষা  
বারো জাতর অস্তিত্ব সম্বন্ধে দ্বি-আকচুটি তলে ইকরানি অইল ।

সমাজর অনেক গিরিগিথানিয়ে মাততারা যে বিষ্ণুপ্রিয়া মণিপুরী  
ভাষা এহান জরমও নাছে ওহানরে ৮ম তপশীলে নেনার প্রস্তাব  
কেন্দ্রীয় সরকারবাং দেসী ওহান নিতান্ন অসম্ভব মনে অর, এ  
কথাহান হাইহান যেকা আমি অদূরদর্শী দৃষ্টি কোনলো চেয়ার,  
কিন্তু কূটনৈতিক দূরদৃষ্টিলো চেয়েতগা কথা এহান শুধুমাত্র যুক্তিসঙ্গতই  
নাগয অপরিহার্যও অর বটে, কিয়াকা বুলেতে, যেহেতু মৈতেয়ে  
নিজর ভাষাহানরে মণিপুরীত পরিবর্তিত করিয়া আমার জাত বারো  
কৃষ্টি কারলয়া নিতারাগা ওকা আমাৰকা ৮ম তপশীলে জানার  
প্রস্তাব মাতানি ছাড়া অন্য পথ নেযর তা'র আমি মাতিয়ার —  
“হে মৈতেই বেইবুনি তুমি উন্নতি কর আমি বাধা নাদিয়ার কিন্তু  
আমারে অমণিপুরী বুলিয়া জাতিচ্যুত না করিয়ও, যদি কররাই,  
ওতাইলে আমি সরকাররে মাততাঙাই আমাৰেও মৈতেইর সমতুল্য  
ফামে নিয়াদেইগা ।”

অষ্টম তপশীলে যিতেগা ঠার আহান সম্পূর্ণ প্রদেশ আহানোর  
ঠারহান অনা লাগের, বারো ও প্রদেশ ওহানর বিধানসভার সম্পূর্ণ  
সীকৃতি পানা লাগের এবং সংখ্যাগরিষ্ঠ ভাষাহান অনাও লাগের,  
জনসংখ্যাও অন্ততঃ কয়েক লাখ অনা লাগের ওহান অইলে অষ্টম  
তপশীলে হমানির যোগ্যতা পা পারের । ৮ম তপশীলে ঠারআহান  
হমেইলেগা অনেক সুযোগ সুবিধা পেইতারা ।



কোন কারণে কৌশলে, আমার মানু হাবিয়ে যদি হাবিয়ে তিলিয়া কোন আক্কেই সংখ্যাগরিষ্ঠ প্রদেশ কিংবা প্রশাসন গড়া পারিয়ার কিংবা সাহিত্য একাডেমী এওয়ার্ড্ আনে পারিয়ার ঔতাইলে যোগাতা পেইবাংতাও বৌ নেয় ।

মেইতেইএ তানুর ঠারহান মেইতেই বুলিয়া অষ্টম তপশীলে নিলেগা আমারতা কিত্তাউ ক্ষতি নেই কিন্তু ক্ষতিহান অইতইতাই মনিপুরী বুলিয়া নিলেগা । কিয়াকা বুলেতে মনিপুরী শব্দ ঔগোর ভিতরে আমার জাত পালনির অস্তিত্ব বারো সমাজ এবং সংস্কৃতিক জড়িত আছে । এ শব্দ এগর লগে সহস্রাধিক এম্প্লেইমেন্ট বারো অন্যান্য অসংখ্য এলা নাছার সুযোগ সুবিধাও জড়িত আছে । যদিও মেইতেইএ তানুর ঠারহানরে মেইতেই নাবুলিয়া মনিপুরী বুলতারা, ঔহান বিষ্ণুপ্রিয়া মনিপুরী এতাই কিন্তু অকরাগ্ভট্ট প্রতিবাদ জানেয়া আয়্তারাহান ।

এসাদে পরিস্থিতিত বিষ্ণুপ্রিয়া মনিপুরী ভাষা এহান স্কুলে নাচলাছি সময় এহানাত মনিপুরী নাঙহানল যদি মেইতেই ঠারহান ৮ম তপশীলে যারগা ঔতাইলে মেইতেয়ে আমারে সুজাসুজিতাবে “বিষ্ণু-প্রিয়া এতা মনিপুরী নাগয়” বুলিয়া ‘আসাম’ বারো ‘ত্রিপুরা’ সরকাররে প্রভাবিত করে পারতায় । সমাজর বিভিন্ন সংস্থার প্রমাণ সাপেক্ষ বারো ন্যায় দাবী তুলিয়া ধরেছিল। যেহানর পরিপ্রেক্ষিতে কেন্দ্রীয় গৃহ মন্ত্রালয়, Register General of India বারো অল্প সংখ্যক ভাষাগোষ্ঠীর আয়ুক্ত গিরকে সর্বসম্মতি ক্রমে বিষয়হান লু করে নীরক্ষণ করিয়া স্বীকৃত দিয়াগেছিগা, ঔতা হাবির সৃষ্টি থানা সত্ত্বেও আমি যদি ইমাঠারে শিকার দাবী নাকরিয়া ইম্পানি অয়াথায়ার ঔতাইলে আমি আজীবন মেইতেইর আঙুলির ঈশারায় নাহ্তে থাইতাঙায় ।

বর্তমানে হাবিবাবাদেত্তে জনমত আমার হিতার্থে জোয়ার কায়া আহের সময় এহানাত প্রত্যেক সংস্থার মাপু, অগ্রগামী সংবাদ

সংস্থার সম্পাদক, সাংবাদিক বারো আইনজ্ঞ এবং অন্যান্য গণ্যমান্য নাগরিক গিরিগিথানীয়ে আমার জড় বারো ক্রৈব্য পরিস্থিতিরে জাগেয়া তুলানিরকা হেইচ। জানেইতার। লগে আমার সতানিষ্ঠার প্রতিও তীর্থকভাবে টিপ্পনি করতারা কিন্তু, নিজর পঙ্গুতারে আমি স্বীকার নাকরিয়া নানান অর্যোক্তিক অজুহাতলো নিজরে কালকরানির চেষ্টা করিয়ার।

অবশ্য Eight Schedule বা ৮ম তপশীলর প্রকোপেত্ত জিংতা-নিরকা আমি সুপ্রিম কোর্ট অর আশালো বয়া থানাহান আমি নিজরে নপুংসকতার পরিচয় দেনাহান অইতই। আমি আক্‌তারও মানতে রাজী নাইতাঙাই যদি কোনগই আমারে বীর অর্জুনর বংশধর নাগই বুলতারা। আমি অজ্ঞেয় ক্ষত্রীয়, যদিও এবাকা আমার লালফামর কার দিল্লী পেয়া ফওঅইলগা এবং আশা করিয়ার অনতিবিলম্বে “আসল মণিপুরী” কুংগ এহান নিশ্চর লেপইতই বারো রীতিমত চেষ্টা, একতা থাইলে আমার হাবি আশা পুরা অইতে নিয়াম দিন বাকী নেই।

শ্রী শুকুমার সিংহ




*With best compliments from :*

## **M/S. RED PRESS**

**For all Sorts of Quality Printing Rubber stamp  
making & Book binding etc.**

**Tarapur Pt. - VII**

**SILCHAR-3**





## প্রকাশিকার নিবেদন

পাঠক পাঠিকা গিরিগিথানীরাঃ মোর হৃদয়োপা অভিনন্দন  
কাংকরোরি । এ সাহিত্য পত্রিকাহানর সম্পাদিকা শ্রীমতী শান্তি  
সিংহর বিশেষ অনুরোধে এ “চিন্তা” নাঙর পত্রিকাহানর প্রকাশ  
করানির গুরু দায়িত্বহান লয়া মি এরে নেই এগয় কিন্তু নিজরে নিয়াম  
ধন্য মনে করুরী । এ পত্রিকা এহান প্রকাশ করতে শ্রীমতী মণিমালা  
সিংহ, শ্রী সুদর্শন সিংহ, শ্রী হরেকৃষ্ণ সিংহ, শ্রী ভানু সিংহ,  
শ্রী দয়ানন্দ সিংহ, শ্রী ইন্দ্রকুমার সিংহ গিরক গাছিরাংত অর্থ সাহায্য  
পানায় মি তানুনাং ঋণী । পত্রিকা প্রকাশ করানীত প্রেসর হাবিত্ব  
হিন কাম উতাত শ্রী বদন সিংহ গিরকর বলিষ্ঠ পাংলাক ওহানরে  
মি পাছরে ছুয়াকুরী । রেড্ প্রেসর সংশ্লিষ্ট কর্মী হাবিরে মোর  
অভিনন্দন জানাউরী । পত্রিকাহানর মলাটর রূপকার শ্রী শক্তি কুমার  
সিংহ গিরকরে কিতা বুলিয়া ধন্যবাদ জানেইতু ও ভাষা ওহান মি  
বিছারেয়া নাপাউরী । পত্রিকাহানর লেখক, লেখিকার লেখনি ওতা  
পাকরিয়া পাঠক পাঠিকায় খানিমানি হারোপিয়ম পেয়া থাইলে  
ওহানি লেখক, লেখিকার প্রাপ্যহান বারো গালিহানি খেইকরে  
প্রকাশিকার কা বদিবাং । বিষ্ণুপ্রিয়া মণিপুরী ভাষার সাহিত্য জগতে  
এ পত্রিকা এহানে সাহিত্যর মান যদি ০১% আগ বাড়াদিয়া থার  
ওহান অয়লে ও প্রাপ্য ওহানি উপদেষ্টা শ্রী স্মৃতিকুমার সিংহ,  
অভিযুক্ত বারো সম্পাদিকা শ্রীমতী শান্তি সিংহ গাছিরহান ।

বিষ্ণুপ্রিয়া মণিপুরী ভাষার সাহিত্য জগতে স্বানামধন্য ঈর্ষনীয়  
সাহিত্যিক, কবি শ্রী ব্রজেন্দ্র কুমার সিংহ গিরকরে বারো বিষ্ণুপ্রিয়া  
মণিপুরী ভাষা তত্ত্বর পথপ্রদর্শক মাননীয় ডাঃ কালীপ্রসাদ সিংহ  
গিরকরে প্রণাম ।

শ্রীমতী শিবানী সিংহ  
প্রকাশিকা  
ভুবনেশ্বর সাধুঠাকুর রোড  
শিলচর—৩